



№ 203

2020 yil «27» февраль

**Ўзбекистон Республикаси Вазирлар Маҳкамасининг 2020 йил
20 февралдаги “Ташқи реклама бозорини тартибга солиш тўғрисида”ги
104-сонли қарори ижроси ҳақида**

Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарори ижросини таъминлаш мақсадида,

Қ А Р О Р Қ И Л А М А Н:

1. Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарори ижро учун қабул қилинсин.

2. Ўзбекистон Республикаси Вазирлар Маҳкамасининг мазкур қарорига мувофиқ:

ташқи реклама объектларини (конструкцияларини) қуриш тартиби тўғрисидаги низом;

ташқи реклама объектларини (конструкцияларини) қуриш учун бериладиган ер участкалари, давлат мулки бўлган бино ва иншоотлар рўйхатини шакллантириш тартиби тўғрисидаги низом;

ташқи реклама объектларини (конструкцияларини) ер участкалари, давлат мулки бўлган бино ва иншоотларда қуриш ҳуқуқини электрон аукцион орқали бериш тартиби тўғрисидаги низом;

ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низом;

ташқи реклама объектлари (конструкциялари) хавфсизлигининг умумий техник регламенти тасдиқланганлиги маълумот учун қабул қилинсин.

3. Қуйидагилар:

а) Вазирлар Маҳкамасининг мазкур қарори қабул қилингунга қадар қонун ҳужжатларига мувофиқ ташқи реклама объектларини (конструкцияларини) ўрнатиш учун тузилган шартномалар, берилган паспортлар, гувоҳномалар, сертификатлар, рухсатномалар ва ҳуқуқни белгиловчи бошқа ҳужжатларнинг амал қилишини узайтирилиши;

ер участкаларидаги ташқи реклама объектлари (конструкциялари) учун 10 йил муддатга, давлат мулки бўлган бино ва иншоотлардаги ташқи реклама объектлари (конструкциялари) учун 5 йил муддатга Давлат хизматлари марказлари орқали реклама жойлари паспортларини берилиши;

ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низомда кўрсатиб ўтилган бир марталик йиғим суммасини тўлаш орқали амалга оширилиши ҳамда ушбу маблағлар бир йил давомида ҳар ой тенг тақсимланган ҳолда туманлар маҳаллий бюджетига ўтказилиши;

б) қалбакилаштирилган ҳужжатлардан фойдаланилган ҳолда ташқи реклама объектларига (конструкцияларига) олинган паспортлар, гувоҳномалар, рухсатномалар ва ҳуқуқни белгиловчи бошқа ҳужжатлар, шунингдек, тегишли ваколатли органнинг қарорисиз ўрнатилган ташқи реклама объектлари (конструкциялари) бўйича ҳужжатларнинг муддатини узайтиришга рухсат берилмайди ва улар ҳақиқий эмас деб ҳисобланиши;

в) ер участкаларига ўрнатилган видео экранли ташқи реклама объектлари (конструкциясига) учун ушбу банднинг “а” кичик бандида кўрсатилган муддат қўшимча равишда 10 йилга узайтирилиши;

г) ер участкаларига ўрнатилган видео экранли ташқи реклама объектига (конструкциясига) ташқи рекламани жойлаштириш ҳуқуқи учун маҳаллий давлат ҳокимияти органлари томонидан белгиланадиган йиғим миқдorigа 0,5 коэффицент қўлланилиши;

д) миллий байрамлар, хорижий давлатлар раҳбарларининг давлат ташрифлари ва бошқа давлат тадбирларига оид ахборот ташқи реклама объектларида (конструкцияларида) жойлаштирилганда, ташқи рекламани жойлаштириш ҳуқуқи учун ойлик йиғим миқдори тегишли ҳокимлик қарорига биноан жойлаштирилган кунларга мутаносиб равишда камайтирилиши;

е) Вазирлар Маҳкамасининг талабларига мувофиқ ҳолда битта реклама жойида бир нечта ташқи реклама объектлари (конструкциялари) қурилганлиги ва улар турли тадбиркорлик субъектларига тегишли эканлиги аниқланган тақдирда, қайта электрон аукцион ўтказиш орқали ушбу жойда фақат битта ташқи реклама объектини (конструкцияни) қуриш ҳуқуқи берилиши;

2020 йил 1 мартдан бошлаб Тошкент шаҳрида ташқи рекламани жойлаштириш соҳасидаги фаолиятнинг алоҳида тартиби жорий этилганлиги, бунда:

Вазирлар Маҳкамасининг 2018 йил 30 августдаги 702-сон қарорига мувофиқ реклама соҳасида амалга оширилиши лозим бўлган фаолияти бўйича ишчи органи сифатида Тошкент шаҳар Қурилиш бош бошқармаси тузилмасидаги “Архитектура-режалаштириш бюроси” давлат унитар корхонаси белгиланганлиги инобатга олинсин.

4. Тошкент шаҳар Қурилиш бош бошқармаси (Б.Холматов), Ер ресурслари ва давлат кадастри бошқармаси (Ғ.Расулов), туман ҳокимликлари билан биргаликда:

ташқи реклама объектларини (конструкцияларни) қуриш учун бериладиган ер участкаларини аниқлаш, уларнинг рўйхатини шакллантириш;

ташқи реклама объектларини (конструкцияларини) тизимли мониторинг қилиш, уларни ноқонуний жойлаштириш ҳолатларини аниқлаш ва тегишли чора кўриш учун ваколатли органга таклифлар киритилиши;

ташқи реклама объектларини (конструкцияларини) ер участкаларида жойлаштириш ҳуқуқини (“E-IJRO AUKSION” орқали) фақат юқори технологияли ташқи реклама объектларига (конструкцияларига) берилиши;

2020 йил 31 декабрга қадар биринчи даражали марказий қатнов кўчаларида ҳамда 2021 йил 31 декабрга қадар иккинчи даражали марказий қатнов кўчаларида жойлаштирилган ташқи реклама объектларини (конструкцияларини) юқори технологияли қурилмаларга босқичма-босқич ўзгартирилиши;

биринчи даражали марказий қатнов кўчаларида фақат видео экранли ва иккинчи даражали марказий қатнов кўчаларида аралаш турдаги юқори технологияли ташқи реклама объектлари (конструкциялари) ўрнатилиши назарда тутиш, бунда:

биринчи ва иккинчи даражали марказий қатнов кўчаларида ўрнатилган ташқи реклама объектлари (конструкциялари) учун реклама жойлари паспорти мос равишда мазкур банднинг бешинчи хатбошида кўрсатилган муддатларгача рухсат берилиши ҳамда ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низомда кўрсатиб ўтилган бир марталик йиғим ундирилмаслиги;

ташқи реклама объектларини (конструкцияларини) юқори технологияли қурилмаларга ўзгартириш ишлари белгиланган муддатларда бажарилмаган тақдирда, бундай қурилмалар уларнинг эгалари томонидан ўз кучи билан олиб ташланиши (демонтаж қилинади) ва ер майдони тартибга келтирилиши, акс ҳолда қурилмалар суд тартибида тегишли туман ҳокимликлари томонидан демонтаж қилиниши ва барча ҳаражатлар реклама объектлари (конструкциялари) эгаларидан ундирилиши таъминлансин.

5. Тошкент шаҳар ҳокимининг биринчи ўринбосари (Д.Хидоятлов), Қурилиш бош бошқармаси (Б.Холматов), туман ҳокимликлари:

бир ой муддатда юқори технологияли ташқи реклама объектлари (конструкциялари) ўрнатилиши лозим бўлган биринчи даражали ва иккинчи даражали марказий қатнов кўчалари рўйхати тасдиқлансин;

Вазирлар Маҳкамасининг мазкур қарори ва бошқа қонунчилик ҳужжатлари талабларидан келиб чиқиб, “Архитектура-режалаштириш бюроси” давлат унитар корхонасининг уставига тегишли ўзгартиришлар ва кўшимчалар киритилиши бўйича таклиф киритилсин.

6. Тошкент шаҳар қурилиш бош бошқармаси (Б.Холматов):

Тошкент шаҳрида ташқи рекламани жойлаштириш соҳасидаги фаолиятнинг алоҳида тартибини амалга ошириш яқунлари бўйича 2021 йил 1 январга қадар бўлган муддатда ушбу қарорнинг 4-банди нормаларини янада такомиллаштириш юзасидан Қурилиш вазирлигига таклиф киритилсин.

7. Туман ҳокимликлари, Тошкент шаҳар Қурилиш бош бошқармаси (Б.Холматов), Ер ресурслари ва давлат кадастри бошқармаси (Ғ.Расулов) билан биргаликда:

ташқи реклама объектларини (конструкцияларини) куриш учун бериладиган ер участкаларини ҳамда давлат мулки бўлган бино ва иншоотларни аниқлаш мақсадида ҳудудларни ўрганилиши;

ташқи реклама объектларини (конструкцияларини) жойлаштириш учун ер участкасидан фойдаланиш ҳуқуқини, шунингдек, давлат мулки бўлган бино ва иншоотларга реклама объектларини жойлаштириш ҳуқуқини белгиладиган ҳужжатлар тайёрланиши;

ташқи реклама объектларини (конструкцияларини) тизимли мониторинг қилишни ва уларни ноқонуний жойлаштириш ҳолатларини аниқлаш;

ташқи реклама объектларида (конструкцияларини) жойлаштирилган рекламалар, шу жумладан ижтимоий рекламалар ҳисобини юритиш;

йўлнинг қатнов қисмида жойлашган аҳоли турар-жой биноларининг ташқи қисмида (балкон, лоджия, дераза, эшик ва бошқа тарафига) ҳар қандай турдаги шахсий эълонларни жойлаштирилишига йўл қўймаслик чораларини кўриш;

ушбу соҳада аниқланган қонунбузарлик ҳолатлари бўйича тегишли чора кўриш учун Ўзбекистон Республикаси Монополияга қарши курашиш қўмитасининг ҳудудий бошқармаларига таклифлар киритилиши таъминлансин.

8. Туман ҳудудларида ўрнатилган барча турдаги ташқи реклама объектларини (конструкцияларини) хатловдан ўтказиш бўйича туман ишчи гуруҳининг намунавий таркиби иловага мувофиқ тасдиқлансин.

9. Туман ишчи гуруҳлар:

ўн кун муддатда ҳар бир туман бўйича ишчи гуруҳлар томонидан барча турдаги ташқи реклама объектларини (конструкцияларини) ушбу қарор талабларига мувофиқлиги юзасидан хатлов ўтказилсин;

хатлов натижалари бўйича жойлаштирилган ташқи реклама объектларининг (конструкцияларининг) Вазирлар Маҳкамасининг мазкур қарор талабларига мувофиқлиги юзасидан хулосалар берилиши;

Вазирлар Маҳкамасининг ушбу қарори қабул қилингунга қадар қалбакилаштирилган ҳужжатлардан фойдаланилган ҳолда, ташқи реклама объектларига (конструкцияларига) олинган паспортлар, гувоҳномалар, рухсатномалар ва ҳуқуқни белгиловчи бошқа ҳужжатлар, шунингдек, тегишли ваколатли органнинг қарорисиз ўрнатилган ташқи реклама

объектлари (конструкциялари) бўйича ҳужжатларни ўн календарь кун ичида бекор қилиниши;

ташқи реклама объектларини (конструкцияларини) жойлаштириш учун паспортлари, гувоҳномалари, сертификатлари, рухсатномалари ва ҳуқуқни белгиловчи бошқа ҳужжатлари бекор қилинган ёки ушбу ҳужжатлар мавжуд бўлмаган (рухсатсиз ўрнатилган) ташқи реклама объектларини (конструкцияларини) ўттиз календарь кун ичида демонтаж қилиш бўйича зарур чоралар кўрилиши;

ташқи реклама объектлари (конструкциялари) эгаларига ушбу қарор талабларига жавоб бермайдиган ҳолатларни 2020 йил 20 феврал кунидан бошлаб олти ой ичида бартараф этиш тўғрисида кўрсатмалар берилиши таъминлансин;

хатловлар натижасида амалга оширилган ишлар ва туманларда ташқи рекламаларни жойлаштирилишини тартибга солиш бўйича кўрилган ишлар натижалари бўйича маълумотларни ҳар уч ойда Тошкент шаҳар ҳокимлигига тақдим этилсин.

10. Тошкент шаҳар ҳокимининг биринчи ўринбосари (Д.Хидоятлов):

уч ой муддатда махсус ишчи гуруҳлар томонидан амалга оширилган ишлар ва маъмурий ҳудудда ташқи рекламани жойлаштиришни тартибга солиш бўйича кўрилган чора-тадбирлар натижалари тўғрисида Вазирлар Маҳкамасига батафсил ахборот киритилиши таъминлансин.

11. Тошкент шаҳар ҳокимининг биринчи ўринбосари (Д.Хидоятлов), Тошкент шаҳар қурилиш бош бошқармаси (Б.Холматов), туман ҳокимликлари:

шундай тартиб ўрнатилганлиги, унга мувофиқ:

автомобиль йўлларининг ажратувчи бўлагида, хусусан йўлнинг ёнма-ён жойлашган қатнов қисмларини ажратувчи, транспорт воситалари ҳаракатланиши ёки тўхташи учун мўлжалланмаган, йўл сатҳидан баланд ва (ёки) ётиқ чизиғи билан белгиланган қисмида ҳамда тротуар ва пиёдалар йўлкаларида, хавфсизлик оролчаларида ташқи реклама объектларини (конструкцияларини) ўрнатиш тақиқланади, айланма ҳаракатланишли чорраҳалардаги хавфсизлик оролчалари бундан мустасно эканлиги;

ижобий ҳулоса фақат жойлаштирилган ташқи реклама объектлари (конструкциялари) ушбу қарор талабларига тўлиқ мос келганда ҳамда улар бўйича тегишли кўрсатмага мувофиқ аввал аниқланган қоидабузарликлар бартараф этилган тақдирда берилиши;

ҳулоса Давлат хизматлари марказлари орқали реклама жойининг паспортини олиш учун асос бўлиши;

ҳулосаларнинг қонунийлиги ва ишончлилиги, шунингдек, ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги материалларни ўз вақтида Тошкент шаҳар ҳокимлигига тақдим этилиши учун шахсан жавобгар этиб белгиланганлиги;

ташқи реклама объектлари (конструкциялари) эгалари махсус ишчи гуруҳларнинг хулосалари ҳамда туман ҳокимликларининг ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги қарорлари устидан суд тартибида шикоят бериш ҳуқуқига эга эканликлари инобатга олинсин.

12. Тошкент шаҳар қурилиш бош бошқармаси (Б.Холматов):

махсус ишчи гуруҳлар томонидан тақдим этилган маълумотлар асосида ташқи реклама объектларининг (конструкцияларининг) ягона электрон реестрини шакллантириш ва ўзининг расмий веб-сайтига жойлаштириш чоралари кўрилсин.

13. Мазкур қарорнинг ижросини назорат қилиш Тошкент шаҳар ҳокимининг биринчи ўринбосари Д.Хидоятлов, Қурилиш бош бошқармаси бошлиғи Б.Холматов ва туман ҳокимликлари зиммаларига юклатилсин.

Тошкент шаҳар ҳокими



Ж.Артикходжаев